



mjesečni Bilten

omladinska mreža bosne i hercegovine

Avgust
Kolovoz

2018.

231

Dragi prijatelji/ce,

Predstavljamo vam **avgustovsko** izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **185** organizacija i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.omladina-bih.net



SADRŽAJ

Aktivnosti u avgustu 2018.....	2
Planovi za septembar 2018.	5
Aktivnosti članova mreže	6
Novе članice	19
Saopštenja/informacije/donatori/pozivi	21

Uživajte u čitanju!

AKTIVNOSTI ORC/HCA U AVGUSTU 2018.

Profesionalna orijentacija kroz pasoš kompetencija

ORC Tuzla je početkom jula pokrenuo projekat "Profesionalna orijentacija kroz pasoš kompetencija", podržan od strane Ambasade SAD u Sarajevu.

Projekat će se realizirati u narednih 6 mjeseci i pružit će podršku za najmanje 100 mladih ljudi sa šireg područja Tuzle (Lukavac i Živinice) iz završnih razreda osnovnih škola i prvih razreda srednjih škola.

Nakon otvaranja projekta, na kojem su pokazali izuzetnu zainteresovanost gotovo svi pozvani mediji, pristupilo se izradi analiza ponuda srednjih škola na području Tuzle, Lukavca i Živinica. Takođe, u analizi su predstavljeni svi smjerovi koje nude srednje škole, a isto tako predstavljena je „Analiza potreba tržišta rada u Federaciji BiH 2016/2017“, koju je sproveo Federalni zavod za zapošljavanje Sarajevo. Unutar analize koja je predviđena projektom, predstavljena je komparacija školskih smjerova i potražnje tržišta rada, što je rezultiralo određenim zaključcima koji su od koristi obrazovnom sistemu u TK-a.

Tokom mjeseca avgusta, pored analize, pristupilo se pripremi kurikuluma „Životne vještine“ koji sa realizacijom kreće u mjesecu septembru. Kurikulum „Životne vještine“ bit će realizovan kroz set radionica koje će pohađati mladi ljudi iz srednjih škola sa područja Tuzle, Lukavca i Živinica.

“Objavlivanje ovog teksta je finansirano grantom Ministarstva vanjskih poslova Sjedinjenih Američkih Država (Department of State). Mišljenja, nalazi i zaključci koji su ovdje navedeni pripadaju autorima i ne odražavaju nužno mišljenja, nalaze i zaključke Ministarstva vanjskih poslova Sjedinjenih Američkih Država.”



Omladinska grupa ORC Tuzla

Budi junak/inja svoje zajednice



17. avgusta u prostorijama Omladinske Banke Tuzla održan je sastanak o individualnim planovima i potrebama organizacija za naredni period. Sastanak je održan u sklopu kampanje "Budi junak/junakinja svoje zajednice" sa ciljem prikupljanja informacija o potrebama i interesima mladih. Na temelju dobivenih podataka radit će se na kreiranju novih kriterija koji će svi aplikanti morati proći prilikom apliciranja na novi aplikacioni poziv Omladinske Banke.

Ideja kampanje je da pruži priliku vrijednim mladim ljudima koji svakodnevno uče, koji su angažovani u društvu, omladinskim udruženjima, koji svojim radom i zalaganjem motivišu druge. Ovom sastanku je prisustvovala članica Omladinske grupe omladinskog resursnog centra Mirela Biković.

ExEgypt Annual Medical Summer School



Ljetna škola „ExEgypt“ svake godine okuplja najaktivnije studenata medicine iz cijelog svijeta da učestvuju na programu stručnog usavršavanja u vidu tematskih predavanja i kliničke prakse. Cijeli program se implementira u Suez Canal University Hospital (Ismailia, Egipat). Početkom 2018. godine, član Omladinske mreže i student Medicinskog fakulteta Univerziteta u Tuzli, Adnan

Mujanović dobio je poziv za učešće na ovoj ljetnoj školi, kao jedini učesnik iz Bosne i Hercegovine koji je ikada učestvovao na ovom programu. Ove godine je program okupio mlade iz Njemačke, Belgije, Poljske, SAD, Kanade, Brazila, Indonezije, Lebanona, itd.

Kvaliteta stanja u javnom sektoru i Univerzitetskim klinikama u Egiptu, uprkos ogromnoj želji i znanju zdravstvenih profesionalaca, i dalje blijedi u komparaciji sa stanjem u Europskim zemljama, uključujući i BiH. Međutim, uprkos trenutnoj situaciji, putem razgovora sa studentima, ljekarima, pacijentima i drugima – i dalje se osjeti snaga duha kojom je prožeta arapska kultura. Učešće na ovogodišnjoj ljetnoj školi je omogućeno zahvaljujući podršci Federalnog ministarstva obrazovanja i nauke Bosne i Hercegovine, Rotaract zajednice BiH i Austrije, Bosnalijek, Hemofarm i Plamingo d.o.o..



Narandžasti dan (Orange day)

Omladinska grupa Omladinskog resursnog centra Tuzla u suradnji sa drugim lokalnim nevladinim organizacijama 25.08.2018. na Sonom trgu obilježila je "Narandžasti dan". Izvedena je simulacija nasilja, kako bi se ispitale reakcije stanovništva na nasilje. Građani su reagovali na nasilje, a nakon simulacije je urađen i flashmob kojim smo skrenuli pažnju na važnost Narandžastog dana.



Generalni sekretar UN-a je proglasio svaki 25. u mjesecu Narandžastim danom (Orange day), kao dan podsjećanja na važnost prevencije nasilja. Veoma je važno da mladi ljudi, ali i svi ostali budu svjesni problema kojim su okruženi, te ne ostanu nijemi i bore se protiv njih. Još jedan od ciljeva Narandžastog dana je informisanje žrtava nasilja kojim se sve institucijama mogu obratiti u slučaju nasilja. Pored Omladinske grupe ORC-a Tuzla, u realizaciji su učestvovali i: Asocijacija srednjoškolaca u BiH - lokalni tim Tuzla, Omladinska banka, Omladinski pokret Revolt Tuzla, Crveni križ Tuzla. Koordinatorica ove aktivnosti bila je članica Omladinske grupe Samira Aličić.

Seminar MoveEQ



U vremenskom periodu od 16. do 19. avgusta, održan je seminar za mlade MoveEQ u prostorijama Dramar centra u Tuzli. Cilj ovog seminara bio je rad na izgradnji sebe i razvoju vještina, a svaki dan seminar je bio podijeljen na dvije sesije (ukupno 8 sesija). Teme ovoga seminara bile su aktivno slušanje, komunikacija i rješavanje konflikta, vještine timskog rada, socijalna inteligencija, kreativno rješavanje problema i empatija. Na ovom seminaru učešće su uzeli i članovi ORC-a Benjamin Burek i Amina Džananović.

Vikend aktivizma

Vikend aktivizma, čiji je organizator nevladina organizacija Oštra nula, realizovan je od 17. do 19. Avgusta u Banja Luci. Na vikend aktivizmu su učestvovali mladi ljudi iz čitave Bosne i Hercegovine. Neke od tema bile su: društveni pokreti u BiH koje su održali Dražen Crnomat i Daniela Došen, predstavnici Udruženja „Pravda za Davida“, dok su teorijski dio predavanja održali Uglješa Vuković pravnik (Transparency International) i Jelena Brkić - aktivistkinja (Centar za životnu sredinu) na temu neposredno učešće građana u poslovima lokalne samouprave. Posljednjeg dana vikend aktivizma

održane su dvije radionice.

Prva radionica je bila na temu „Kada jedan dan vrijedi četiri godine“ (izbori i izborni proces u BiH) koju su održali Zoran Čatić i Mirza Ajandžić ispred Centra za kulturnu i medijsku dekontaminaciju (CKMD). Drugu radionicu je vodila Vildana Hrnjić koja se odnosila na izradu i pisanje političkih poruka na majicama. Na vikend aktivizmu jedan od učesnika bio je I član naše Omladinske grupe Duško Majkić.



REDOVNE AKTIVNOSTI ORC I HCA TUZLA

Tokom avgusta radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

PLANOVI HCA/ORC-A ZA SEPTEMBAR 2018.

- Nastavak implementacije projekta „CAT 18“. U okviru ovog projekta u naredom periodu naše aktivnosti su: Izrada WEB stranice, fb stranice, 3 onground treninga i jedan online trening.
- Nastavak rada na projektnim aktivnostima (održavanje završne konferencije u okviru projekta „Mladi za bolju budućnost“, podržanog od strane Ambasade SAD u Sarajevu). Završna manifestacija održat će se u Tuzli, 21. Septembra, kada će svim učesnicima biti dodijeljeni certifikati o uspješnom učešću na treninzima per edukacije.
- Aktivnosti omladinske grupe ORC-a Tuzla

AKTIVNOSTI ČLANICA OMLADINSKE MREŽE BiH



OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH
Tel./Fax: +387 49 211 032
E-mail: svitac@gmail.net
Web: www.svitac.org
FB: www.facebook.com/omladinska.svitac

Dnevne radionice

Omladinska organizacija Svitac je u avgustu nastavila sa svakodnevnim aktivnostima. Učesnici radionica su podijeljeni u dvije grupe, uzrasta od 4-7 godina svakim danom od 11:00-13:00, a uzrast 8+ od 14:00-15:30 časova. Mlađi učesnici su pravili ribice od papira za akvarijum, marker stranica za knjige u obliku čudovišta, koje su ukrasili po svom izboru. Dekupaž tehnikom su od papirnih tanjira i salveta kreirali razne oblike, te su učili nazive geometrijskih tijela na engleskom i pokušali koristiti lenjir. Učesnici su nastavili učenje azbuke, nakon završene abecede, te sabiranje i oduzimanje. Na muzičkim radionicama su i dalje vježbali pjesmicu „Žalile se žabice“ i „Itsy – Bitsy“, kako bi se ukazalo na ugroženost životne sredine.



Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, te da razviju motoriku, osjećaj tolerancije i poštovanje prema drugima i usvoje lijepo ponašanje. Učesnici druge radionice (14:00-15:30), za uzrast 8+, su vrijedno učestvovali u raznim aktivnostima. Ponedjeljkom se realizuje radionica kreativno izražavanje na kojima su učesnici i ovaj mjesec pravili razne kreacije na temu "Ekologija i zaštita životne sredine", koristeći razne materijale. Kao i prva grupa i ovi

učesnici su pravili šarene akvarijume, razne dekoracije i ukrase, male torbice za mobilne telefone, itd.

Grupa je takođe napisala i dogovorila pravila ponašanja tokom radionice, koja su ukasili i okačili na zid prostorije, gdje se održavaju aktivnosti. Utorkom su učesnici vježbali engleski jezik i svakodnevnu komunikaciju, te razne igre koje poboljšavaju učenje engleskog u grupi i timski rad. Ovaj mjesec su nastavili sa vokabularom o emocijama i izražavanju osjećaja na engleskom jeziku, te su imali priliku slušati stari engleski i dio Šekspirovog pozorišnog komada „Biti ili ne biti,,.

Pored ovih aktivnosti, učesnici su pravili muzičke instrumente od kartona, slušali razne vrste muzike i istoriju njihovog nastanka. Srijedom su održane amaterske lutkarske radionice, učesnici su sami pravili lutke, tj, karaktere te su pisali scenarij; četvrtkom su se družili uz sportske aktivnosti, gdje su igrali razne timske igre, a petkom su nastavili raditi na radionicama njemačkog jezika temu ekologija i zaštita životne sredine i kartice sa vokabularom.

Cilj i ovih aktivnosti je da učesnici razviju maštu i da koristeći razne materijale izraze svoju kreativnost, razviju motoriku, osjećaj tolerancije, poštovanje prema drugima i usvoje lijepo ponašanje.

Koordinator radionica u avgustu je bio Adin Midžić uz asistenciju lokalnih, Weltwaerts i Omprakash međunarodnih volontera. Sve aktivnosti se održavaju u Omladinskom centru Brčko distrikta.

Radionica gitare



Učesnici ove radionice su radili na novim duetima, etidama i kompozicijama („Gavota“, „March Slave“), kao i nekoliko novih pop pjesama po vlastitom izboru („Galway Girl“), „Lithium“) Nastavljen je rad sa modovima melodijske molske skale i korištenju istih u improvizaciji i komponovanju kraćih tema. Učesnici ove radionice su počeli raditi na novoj ideji („Sambasimo“). Kompoziciju karakteriše veoma brz tempo i bazirana je na tipičnoj II-V-I kadenci. Učesnici su ponavljali i sopstvene kompozicije iz prethodnog perioda („Ambience“ „Perodactyl 1 i 2, Kiborzi“).

Eko projekat

Omladinska organizacija Svitač zajedno sa članovima ASUBiH Lokalnog tima Brčko u maju je započela rad na zajedničkom Eko projektu. Početkom avgusta je realizovana aktivnost čišćenja okruženja manjeg dječijeg igrališta, te sadnja cvijeća i začinskih biljaka.

Zaštita životne sredine je veoma važna tema. Ovaj projekat će omogućiti mladima da razviju i realizuju svoje ideje o životnoj sredini i njenoj zaštiti, a također im treba pružiti priliku da se upoznaju sa drugima istih interesovanja, kako bi imali mogućnost aktivno raditi na realizaciji svojih ideja.

Međunarodni dan prijateljstva

Povodom Međunarodnog dana prijateljstva, koji se obilježava 30.07, Omladinska organizacija Svitač je organizovala kreativne radionice za dvije grupe učesnika. Cilj radionica je bio da se promoviše važnost prijateljstva, podrške i međusobnog razumijevanja. Na radionici za učesnike uzrasta od 4 do 7 godina kreirala su se origami srca, koja su na kraju aktivnosti bila međusobno razmijenjena kao pokloni.

Druga grupa je pravila čestitke za svoje drugare, te su imali diskusiju na temu važnost prijateljstva i uzajamnog poštovanja. Zadnjih pola sata aktivnosti su radili igre povjerenja. Sve aktivnosti su održane u prostorijama Omladinskog centra Brčko distrikt.



Dan mladih


Omladinska organizacija Svitač je obilježila „Dan mladih“ specijalnim radionicama u cilju promovisanja važnosti aktivizma i razumijevanja mladih ljudi. Lokalni tim ASUBiH organizovao je radionicu za učesnike 4-7 godina. Predstavili su se kao popularni superheroji poznati djeci. Cilj prezentacije je bio da prikažu kako oni, kao mladi ljudi pomažu svojoj lokalnoj zajednici u Brčkom. Zatim se vodila diskusija kako

najmlađi učesnici mogu postati njihovi pomoćnici i malim koracima pomagati njihovoj lokalnoj zajednici, počevši od roditelja u njihovom domu.



Starija grupa učesnika je imala priliku da nauči omladinski govor "Sleng". Prvo su naučili njemačke i engleske fraze od naših internacionalnih volontera, a onda su učesnici naučili internacionalne volontere lokalne "Sleng" riječi. Zatim su slušali priče internacionalnih volontera kako oni provode vrijeme kao omladina u svojim zemljama, poslije su proslavili dan mladih sa "Sladoled zabavom".

Za septembar se planira nastavak svih redovnih radionica Omladinske organizacije Svitac.



Institut za
razvoj mladih KULT



Ul. 4. Viteške brigade
34 – 36 BA, 71210 Ilidža,
Sarajevo
Tel: +387 33 778 778.
Fax: +387 33 778 79
E-mail: kult@mladi.org,
web: www.mladi.org

Koliko brinemo o 700.000 mladih u BiH?



„Koliko brinemo o mladima“, pitanje je kojim je Institut za razvoj mladih KULT obilježio 12. avgust – Međunarodni dan mladih. Postavljanjem zastava u centru Sarajeva, na dijelu od Trga djece Sarajeva do tramvajske okretnice Skenderija, na kojima je ispisano „Koliko brinemo o mladima“, Institut je na Međunarodni dan mladih želio skrenuti pažnju na brojne izazove i težak položaj ove populacije u Bosni i Hercegovini. U Bosni i Hercegovini živi oko 700.000 mladih, koji su zakonima o mladima definisani kao osobe dobi od 15 do 30 godina. Govorimo o 700.000 mladih koji su uglavnom nezaposleni, nezadovoljni obrazovnim i zdravstvenim sistemom, koji ne dobijaju priliku za iskazivanjem, čija se talentiranost ne nagrađuje. Govorimo o mladima koji se u ovoj zemlji ne osjećaju sigurno, ne vide perspektivu, budućnost i koji je mahom napuštaju. Dok je ovogodišnji dan mladih u svijetu posvećen kreiranju sigurnih prostora za mlade u kojima se mogu sresti, angažirati u aktivnostima

vezanim za njihove različite potrebe i interese i slobodno se izraziti, u BiH pažnju moramo posvećivati neadekvatnoj primjeni Zakona o mladima, nepostojanju strategija prema mladima u svim entitetima i na državnom nivou. Moramo brinuti o nezaposlenosti i besperspektivnosti zbog koje mladi napuštaju BiH.

Ujedinjene nacije (UN) su 1999. godine 12. avgust proglasile Međunarodnim danom mladih i od tada se svake godine obilježava kako bi se promovirao aktivizam mladih, te prepoznali naponi i akcije mladih širom svijeta koje doprinose pozitivnim promjenama, razvoju i ekonomskoj dobiti zajednica, a i šireg društva. Odgovore na pitanje „Koliko brinemo o mladima?“ treba dati svaki nivo vlasti u BiH i to kroz dijalog sa mladima diljem BiH, jer će upravo među mladima i pronaći rješenja.

Lokalnim građanskim inicijativama za bolje sutra

Da su lokalne građanske inicijative pokretač značajnih promjena pokazuju inicijative koje su mladi realizovali u Maglaju, Brezi, Sarajevu, Gradačacu, Novom Gradu, Tuzli, Živinicama, Bihaću i Jablanici.

Riječ je o mladima koji su odlučili biti dio jedanaeste generacije obuke „Uči, misli i djeluj!“, njih 26 koji su se godinu dana, koliko traje obuka, odlučili posvetiti učenju, sticanju znanja i unaprijeđenju vještina i kompetencija, te stečeno iskustvo iskoristi na način da djeluje na svoje društvo, a kroz lokalne građanske inicijative.

Mladi aktivisti su kroz višemjesečni program imali priliku da uoče probleme u društvu, a koje su uz pomoć Instituta za razvoj mladih KULT, lokalnih zajednica i organizacija uspjeli i riješiti.

Održavanje radionica o važnosti zdravih životnih stilova, rad sa slijepim i slabovidnim licima, čišćenje lokalnih zajednica i sadnja drveća, razvijanje svijesti o važnosti IT-a u društvu i promovisanje volonterizma i aktivizma, samo su neke od aktivnosti koje su sprovedene u proteklom periodu.

Inicijativa "Ruku pod ruku", koja je za cilj imala podići svijest o ulozi slijepih i slabovidnih osoba u društvu, pomogla je mom vrijednom timu, meni i svim ljudima koji su svojim volonterizmom doprinijeli realizaciji istog, da shvatimo kako za gledanje i razmišljanje izvan kutije nisu bitne oči, nego ono što imamo u svojoj glavi." – istakla je Berina Bulatović, koordinatorica inicijative.

O važnosti UMiD-a govorio je i koordinator projekta „Uređenje trim staze i Vidikovca Špic“ Muhamed Krečinić.

„Poslije UMiD obuke stvari su se promijenile. Naučio sam da stvari kao što je izgradnja vidikovca nisu toliko nedostižne i neizvodive, zapravo su vrlo lako izvodive uz malo znanja i vjere u ono što radimo. UMiD mi je pružio sve to.“ - ističe Muhamed.

"Naša lokalna građanska inicijativa "Čista okolina, zdrava lokalna sredina", ujedno i moj prvi veliki projekat, za mene i moj tim je bila je veliki izazov. Dobiti mogućnost da nešto promijeniš u svojoj lokalnoj zajednici, u današnje vrijeme je nezamislivo. S toga se neizmjereno zahvaljujemo Institutu za razvoj mladih KULT na strpljenju, trudu i radu da nas učini pravim UMiD-ovcima i aktivnim građanima." – poručio je koordinator projekta Ammar Grabić.

Zahvaljujući mladim aktivistima iz navedenih lokalnih zajednica pronađena su rješenja za barem neke od problema sa kojima se svakodnevno susreće bh. društvo.

Šta je to građanska inicijativa?

Lokalna građanska inicijativa (LGI) jeste akcija, aktivnost građana/ki usmjerena na poboljšanje stanja u lokalnoj zajednici i društvu u kojem žive. U građanske aktivnosti mogu se uključiti građani/ke pojedinačno ili zajednički, a sve s ciljem ukazivanja na konkretne probleme i rješavanja problema u zajednici u kojoj žive.



Institut za razvoj mladih KULT podržao je oko 13500 mladih u Bosni i Hercegovini i regiji u njihovim zajedničkim inicijativama za poboljšanje položaja mladih u društvu. U posljednjih 5 godina Institut je dodijelio preko 2.500.000 KM kroz grantove nevladinim organizacijama. Dokaz je to društvene osviještenosti i spremnosti građana/ki, posebno mladih, da budu pokretači pozitivnih promjena u svojoj zajednici.

**Savez distrofičara Republike Srpske**


FRane Supila 31 f, 78000 Banja Luka

Tel: 051 306 094

e-mail: sdrs@blic.net

Uspješno predstavljanje članova SRSD

U Prijedoru je u periodu od 10. do 14. avgusta održan III Sajam mladih preduzetnika, u organizaciji Fondacije „Zajednički put“ iz Prijedora. Na Sajmu je svoje rukotvorine predstavilo 10 izlagača, među kojima su svoje ručno rađene unikate posjetiocima ponudila i dva člana SDRS regije Banja Luka, Draga Radočaj sa svojim origami figurama i Dejana Vujnović sa svojim nakitom od epoksi smole i polimerne gline. Sajam su posjetile i dvije predstavnice SDRS iz Banja Luke, Olivera Mastikosa i Zagorka Hrstić. Štand SDRS je bio vrlo zapažen i posjećen ove godine te su i članovi SDRS vrlo zadovoljni ovogodišnjim predstavljanjem.





Biciklistički klub „Sv. Nikolaj“ Brčko distrikt BiH

Ul. Filipa Višnjića 20, 76100 Brčko Distrikt

Tel.: +387 65 994 069

E-mail: bksvnikolaj@yahoo.com

Saopštenje medijima povodom realizovane aktivnosti “III. Krug prijateljstva - biciklistički maraton regijama Drina-Sava i Drina-Tara”



Biciklistički klub „Sv. Nikolaj“ Brčko osnovan je u januaru 2013. Od tada, BK iza sebe ima 5 uspješno organizovanih biciklijada u Brčkom, brojna putovanja i saradnje sa biciklističkim klubovima iz BiH i regiona.

Po treći put uz podršku Stalne radne grupe za regionalni ruralni razvoj (SWG) u Jugoistočnoj Europi u okviru projekta: "Regionalna saradnja i umrežavanje u oblasti poljoprivrede, ruralnog i ekonomskog razvoja prekograničnih područja", koji je podržan od strane Evropske Unije, Biciklistički klub „Sv. Nikolaj“ Brčko je organizovao međunarodni biciklistički maraton regijama Drina-Sava i Drina-Tara.

Ova turističko-rekreativna manifestacija je za četiri dana trajanja okupila 30 učesnika koji su pedalali preko 300 km od Brčkog do Višegrada i za to vrijeme obišli prelijepu prirodnu lokalitete, kao što su kanjon Tare, sliv rijeke Drine, podrinjske planine, most Mehmed-paše Sokolovića i sl.

Okupljeni maratonci iz Banja Luke, Beograda, Višegrada, Loznice, Bijeljine, Ljubovije, Bajine Bašte, Smederevske Palanke i Brčkog, odsjedajući u seoskim domaćinstvima ovih krajeva, mogli su se upoznati sa turističkom ponudom koju nudi ovaj region, među kojima se, pored prekrasnih prirodnih lokaliteta, ističe i odlična gastronomska ponuda.





Asocijacija srednjoškolaca u Bosni i Hercegovini

Ul. Mula Mustafe Bašeskije 7, 71000 Sarajevo

Tel/fax: +387 33 205 850

E-mail: asubih@yahoo.com

Web: www.asubih.ba

Omladinske zone



Mjesec avgust je za Asocijaciju srednjoškolaca u BiH bio u znaku kampova za mlade, ali i drugih aktivnosti, kao što je stvaranje omladinskih zona u Hercegovini. ASuBiH nikada ne spava, pa smo ovog puta spremili nešto novo i uzbudljivo za vas. Sjećate li se priče o slobodnoj zoni u Sarajevu i njenog značaja za mlade? E, ukoliko ste zaboravili, mi smo tu da vas podsjetimo.

Naime, tokom naših posjeta raznim gradovima širom BiH, razgovarali smo sa mladima o njihovim problemima. Većina mladih se složilo da je to nedostatak prostora za mlade u lokalnim zajednicama.

I pogodite šta? Mi radimo na tom problemu! Ovog ljeta svoju zonu (prostor) dobijaju 3 grada u Hercegovini, a to su Stolac, Trebinje i Posušje.

Zašto baš Hercegovina?

Želimo da istaknemo značaj hercegovačkog kulturno-historijskog naslijeđa, onako kako ga vide mladi koji žive u Hercegovini. Zamisao o jednom prostoru, dobili smo upravo kroz oči mladih ljudi, koji su nam iznosili svoje ideje. Takav prostor sadržavat će klupe, mini binu, stolice, cvijeće, i sve ono što mladi ljudi oduvijek žele! Prostor u kojem će imati mogućnosti za stvaranje ideja, druženja i pomaganju svojoj lokalnoj zajednici. Prva takva omladinska zona napravila se u Stocu 14.8 – 17.8., druga u Trebinju 21.8.-24.8. i posljednja u Posušju 27.-30.8.2018. godine. 30 mladih ljudi iz tri lokalne zajednice su proveli pet dana na svakoj lokaciji i zajedno radili na realizaciji ovog projekta u sve tri gore navedene zajednice. Četiri dana smo uređivali prostor, a peti dan smo slikali mural "Hercegovina – zemlja sunca i krša".

Na muralu su naslikane sve karakteristike koje vežu ova tri hercegovačka grada. Tu istu večer je bilo otvorenje, gdje su se čitale pjesme Maka Dizdara, performans KUD-a "Jovan Dučić" i mažoretkinje iz Stoca, te koncert trebinjskog benda 7. Nebo, kao i učenika muzičke škole u Posušju.

Zajedno sa stanovnicima lokalnih zajednica napravili smo tradicionalnu hercegovačku večeru otvorenog tipa u sve tri lokalne zajednice.



Neki od ciljeva bili su kreiranje prostora za mlade, gdje bi mogli provoditi svoje slobodno vrijeme i organizovati kulturno-umjetničke aktivnosti, promovisati Hercegovinu i njeno historijsko i kulturno naslijeđe mladim ljudima, aktivirati 30 mladih ljudi i motivirati ih za dalji rad u svojim lokalnim zajednicama, te povezati mlade ljude iz različitih dijelova Hercegovine.

Konkurs za pozitivnu priču



Konkurs smo počeli u mjesecu junu ove godine. Sedmično smo objavljivali po jednu priču, sve dok svih 10 nije bilo objavljeno.

Tada smo otvorili glasanje na našoj web stranici, koje je trajalo 7 dana. Najbolja priča po vašim glasovima ove godine je priča koja nam dolazi iz Fojnice. Čestitamo autoru Kenanu Handžiću, kao i profesoru Mirnesu! Hvala svima na učešću, bilo je divno dijeliti pozitivne priče o profesorima širom BiH.

Međunarodni dan mladih

Kao i svake prethodne, i ove godine smo 12.8. obilježili dan mladih u preko 30 lokalnih zajednica. Mladi su kroz više aktivnosti nastojali ukazati svima na prava ali i sve obaveze mladih u jednom društvu. Neki su snimali video snimke u kojima su prikazivali neku inspirativnu osobu iz njihove lokalne zajednice, drugi su dijelili porukice, treći su anketirali građane.

Five days to make changes

U periodu od 15. do 19. avgusta, Udruženje KULT Gradačac, u saradnji sa Lokalnim timom Gradačac Asocijacije srednjoškolaca u BiH i Vijećem mladih Općine Gradačac, organizovao je tradicionalni AktivKULT kamp 2018, ove godine pod nazivom: "Five days to make changes".

Poziv je bio otvoren za srednjoškolce, koji žele da rade na sebi, postanu aktivni građani i samim tim uđu u svijet aktivizma i čari koji on nudi.

U Gradačcu, na prostoru oko Omladinskog trening centra na Popovači, okupilo se ukupno 20 omladinaca sa područja Sjeveroistočne BiH, i to iz: Živinica, Lukavca, Banovića, Maglaja, Tuzle, Brčkog i naravno Gradačca.

"Kao i što sam naziv kampa kaže, svaki dan je imao svoju tematiku, te smo našim učesnicima na inovativan i nama svojestven način pružili znanja i vještine iz sljedećih oblasti: liderstva, timskog rada, javnog zagovaranja, komunikacije, lokalnih građanskih inicijativa, te psihološkog stanja kod tinejdžera. Učesnici su nas veoma pozitivno iznenadili, svojim angažmanom i trudom i drago nam je što se u svoje gradove vraćaju puni elana i motivacije, te će stečeno znanje, moći iskoristiti u svojim prvim akcijama i time poboljšati stanje mladih u svom okruženju" - istakao je organizator kampa.

Gosti su u svoje slobodne vrijeme mogli da nauče nešto novo te da se upoznaju sa iznimno bogatim kulturno-historijskim naslijeđem i znamenitostima Gradačca i prirodnim ljepotama koje nudi, poput naša 2 jezera Hazne i Vidare. Kamp je realizovan uz podršku Instituta za razvoj mladih KULT, Društvenog centra/Networksa i Asocijacije srednjoškolaca u BiH.

Konkurs za dopunske članove upravnoga odbora ASuBiH-a

ASuBiH je nevladina, nestranačka i nepolitička organizacija koja okuplja srednjoškolce iz cijele države. ASuBiH radi na principu lokalnih timova te trenutno okuplja timove u 61 lokalnoj zajednici sa više od 1400 članova i članica.

Kandidati koji se žele prijaviti moraju ispunjavati sljedeće uslove:

- da su državljani Bosne i Hercegovine;
- da pohađaju srednju školu na području Bosne i Hercegovine;
- da nisu aktivisti/kinje neke od političkih partija;
- da je član/ica lokalnog tima ASuBiH-a u mjestu boravka ili školovanja

Konkurs će biti otvoren do 20. septembra/rujna, a rezultati istog biti će objavljeni na našoj web stranici www.asubih.ba 25. septembra/rujna, nakon čega ćemo kontaktirati kandidate i kandidatkinje koji će se predstavljati Generalnoj skupštini, a koja će biti održana u periodu od 12. do 14. oktobra 2018. godine u Sarajevu.

Aplikaciju možete pronaći na našoj web stranici.

SAME Summer Academy



U periodu od 29.07. do 06.08.2018. godine, članovi Asocijacije srednjoškolaca u Bosni i Hercegovini: Bilal Softić, Riad Čilić, Ikbala Makić, Nejla Ibraković, Matea Brkić, Luka Ramljak i Ammar Grabić, prisustvovali su SAME Summer Academy 2018, koja je ove godine održana u Italiji, u gradu Bassano del Grappa.

Ovaj ljetni kamp se svake godine održava u jednoj od zemalja članica SAME-a. Članice SAME-a su organizacije koje implementiraju projekat "Socijalni dan" u svojim

državama, te su tokom trajanja akademije te iste članice imale mogućnost da razmjene iskustva i ideje o tom projektu. "Zahvaljujući ovom događaju, ne samo da smo imali mogućnost da prezentujemo svoj rad ASuBiH-a i zalaganje na ovom projektu, nego i da "pokupimo" nove ideje i tehnike, da bi svoj "Socijalni dan" uradili što bolje i podigli na novu razinu." - kazao je član organizacije. U sklopu ljetnog kampa održana je i III generalna skupština SAME-a, gdje je izabran novi Upravni odbor organizacije. Također, formirane su i radne grupe koje će raditi na razvoju SAME-a kao mreže, kao i izmjene/dopune Statuta organizacije.



H.O. MUSLIMANSKO DOBROTVORNO DRUŠTVO – MERHAMET DOBOJ

Ul. Kralja Aleksandra 17, 74000 Dobož
Tel./fax: +387 53 226 886
E-mail: merhamet.doboj@cutuk.net
FB: www.facebook.com/Merhamet-Doboj

Posjeta članovima Merhamet-a Dobož



Osim stalnih aktivnosti koje obuhvataju evidentiranje članarine, štampanje molbi korisnika, žalbe, raznih dopisa, fotokopiranje, pregled informacija za sastanke, rad sa članovima, pružanje informacija, izrada projekata i prisustvo seminarima, okruglim stolovima, u ovome mjesecu smo radili na raspodjeli humanitarne pomoći.

Predsjednica "Merhamet-a" Dobož, Avdić Faketa u ovome mjesecu je obišla i bolesne članove Merhameta. Jedna od osoba koje smo posjetili je i Atifa Didić. Tokom posjete imali smo priliku vidjeti dvoje ljudi koji rade na održavanju onoga što imaju (sređivanje okućnice).

04.08.2018 Izvršena je raspodjela humanitarne pomoći za članove "Merhamet-a". Obuhvaćeno je oko 300 porodica. Aktivisti "Merhamet-a" se maksimalno trude da namaknu sredstva, kako bi obezbijedili humanitarnu pomoć.

13.08.2018 Aktivisti "Merhamet-a" prisustvovali su prezentaciji "Dani otvorenih vrata", čiji je cilj bio promovisanje društvene kohezije i raznolikosti u BiH.

24.08.2018 Zahvaljujući direktoru regije Banja Luka gosp. Jasminu Spahiću-projektom kurbanskog mesa H.O. "Merhamet" je podjelio za 231 porodicu. Dragi Allah da nagradi sve učesnike ovog projekta



**HO „PARTNER“ Banja Luka**

Ul. Srđe Zlopogleđe 55, 78000 Banjaluka

Tel./fax: +387 51 250 730

E-mail: partner@teol.net

Web: www.hopartner.org

Okrugli sto „Personalna asistencija-šansa za zapošljavanje“



U prostoru Muzičkog paviljona „Staklenac“, parka „Petar Kočić“, u četvrtak 30.08.2018. održan je okrugli sto pod nazivom „Personalna asistencija – šansa za zapošljavanje“. Okruglom stolu prisustvovali su predstavnici Grada Banjaluka, Centra za socijalni rad Banja Luka, Zavoda za zapošljavanje RS, organizacija osoba sa invaliditetom sa područja Grada Banja Luke i Socijalno-edukativnog centra. Na okruglom stolu je bilo riječi o izazovima o promovisanju zanimanja - personalni asistent, vještinama potrebnim za obavljanje ovog posla, prilikama za edukovanje personalnih asistenata, kao i izazovima u organizovanju i pružanju ove usluge.

Pored problema male zainteresovanosti nezaposlenih osoba da obavljaju posao personalnog asistenta, svakako je i mala cijena sata za ovu uslugu. Trenutno su organizacije koje obezbjeđuju personalne asistente u pregovorima sa Centrom za socijalni rad, kako bi se povećala cijena sata, te samim tim i unaprijedio kvalitet personalne asistencije. Okrugli sto je dio aktivnosti projekta „Budi i ti personalni asistent“ kojeg realizuje Humanitarna organizacija „Partner“ uz finansiranje Grada Banja Luka. Cilj projekta da se podigne svijest šire javnosti i promoviše zanimanje personalnog asistenta, te tako utiče na unaprijeđenje kvaliteta ove usluge koja se za sada realizuje samo u Banja Luci.



PRONI Centar za omladinski razvoj

Ul. Mehmedagića 24, 76100 Brčko distrikt BiH
Tel./Fax: +387 49 217 695
E-mail: pronibrcko@teol.net
www.pronibrcko.ba

PRONI Omladinski kamp „Uljepšajmo mir“

„Uljepšajmo mir“ naziv je petodnevnog kampa, koji je za mlade iz deset gradova BiH, uz podršku Američke ambasade, organizovao Proni Centar za omladinski razvoj. Kamp je trajao od 27. do 31. avgusta 2018. godine u mjestu Brka, restoran Holiday. Na kampu su učestvovali mladi ljudi od 18 do 26 godina.

Radilo se u tri grupe. Prva grupa radila je radionice na temu Nenasilne komunikacije među mladima, druga je radila projektne aktivnosti, a treća grupa je imala čast prisustvovati obuci Prve pomoći, koju su realizovali zaposlenici i volonteri Crvenog krsta/križa Brčko distrikta.

Ukupna aktivnost kampa je realizovana sa 43.000 dolara od strane Američke ambasade BiH, a svaki od gradova, za realizaciju projekta, će dobiti po 500 dolara, kako bi projekat bio okončan u narednih jedanaest mjeseci.



NOVE ČLANICE



Proaktivna omladina Kakanj

Krševac bb, 72240 Kakanj

Tel: 060 308 5803

e-mail: proaktivna.omladina@gmail.com

Dana 4.7.2018. u Kakanju održana je Osnivačka skupština udruženja "Proaktivna omladina", u cilju formiranja novog udruženja, koje bi sklonilo omladinu s ulica i podstaklo mlade da se druže i da stvaraju ljepšu sliku o našem gradu i državi. Omladinsko Udruženje „Proaktivna omladina“ je Udruženje koje okuplja mlade ljude iz Kakanja s ciljem poboljšanja života u našoj Općini. Organizujemo razne vrste pomoći, humanitarne akcije, projekti na poboljšanje infrastrukture, edukacije, konferencije... Članovi Udruženja su djelovali kao neformalna grupa do jula 2018., kada se donesena Odluka o osnivanju. Kao neformalna grupa uradili smo dosta projekata za ruralna područja, organizovali pomoć za narod Sirije, a naš rad je prepoznala i općina koja je dodjelila Zahvalnicu Općine 15.04.2018. neformalnoj grupi građana.



Planiramo nastaviti sa aktivnostima, a projekte udruženja će, za početak finansirati, humanitarna organizacija World Vision. Udruženje je vanstranačko, neprofitabilno, nevladino. Udruženje će djelovati na području Zeničko-dobojskog kantona a sjedište Udruženja je na adresi Krševac bb. Udruženje je upisano u Registar udruženja u knjigu XI pod brojem 2388, dana 18.07.2018. Nadamo se da ćemo doprinijeti razvijanju zajednice i ispuniti zacrtane ciljeve u narednom periodu

Glavni programski ciljevi udruženja

- obrazovanje mladih iz raznih oblasti,
- afirmacija mladih i njihov angažman u društvu,

- bolje i brže zapošljavanje mladih,
- preventivno suprostavljanje aktuelnim problemima omladine (alkoholizam, narkomanija i dr.);
- obogaćivanje kulturno-zabavnog i sportsko rekreativnog života mladih,
- razvijanje (psihički i fizički) zdravih budućih generacija,
- saradnja sa drugim udruženjima i organizacijama širom BiH,
- pomoć pri razvijanju drugih nevladinih organizacija i udruženja iz oblasti nauke, kulture, obrazovanja tehničkog i inovacionog stvaralaštva, umjetnosti, informatike, informisanja, sporta i rekreacije i upućuje svoje članove na slične skupove, koje organizuju druga udruženja ili institucije i zemlji i inostranstvu,
- organizuje različite oblike pomoći svojim članovima u razrješavanju njihovih problema u vezi sa obrazovanjem, njih ili članova njihovih porodica,
- organizuje savjetovališni i savjetodavni rad u okviru kojeg pruža različite oblike pomoći svojim članovima radi prevazilaženja i savladavanja duševnih i duhovnih teškoća u vezi sa ostvarivanjem normalnih životnih funkcija njih i članova njihovih porodica,
- osniva fondove podrške u novcu ili naturi za pružanje pomoći svojim članovima radi zaštite njih ili članova njihove porodice, naročito u pogledu očuvanja zdravlja i očuvanja, odnosno poboljšanja dostignutog nivoa životnog standarda,
- organizuje i provodi različite oblike humanitarne djelatnosti prema svojim članovima, a na osnovu odobrenja nadležnog organa i prema ostalim građanima,
- osniva i registruje institucije za obavljanje privrednih i drugih djelatnosti radi stvaranja uslova za brže zapošljavanje vojih članova, članova njihovih porodica i drugih članova,
- organizuje pravnu i drugu pomoć svojim članovima, a na osnovu odobrenja nadležnog organa i drugim građanima, zaštite imovine, prava i pravnih interesa u procesima kod nadležnih organa.



INFORMACIJE / DONATORI / POZIVI

Divided past – joint future: Poziv za projektne prijedloge

"Divided Past - Joint Future" je projekat koji implementira konzorcijum od 18 partnera (7 zemalja korisnica IPA plus Slovenija, Hrvatska, Austrija i Holandija). Konzorcijum projekta uključuje OCD, istraživačke institute, fondacije, resursne centre i Erasmus NA i 13 pridruženih poslovnih partnera. Trajanje projekta je 48 mjeseci (datum početka 1. januara 2016. godine).

U ime pomenutog konzorcijuma Omladinski Komunikacijski Centar iz Bosne i Hercegovine objavljuje:

POZIV ZA PRIJEDLOGE BR. 1

Za odobravanje projekata nevladinih organizacija, OCD koje su registrovane u jednoj od sljedećih zemalja: Bosna i Hercegovina, Srbija, Kosovo (prema UNSCR 1244/99), Crna Gora, Sjeverna Makedonija i Turska.

Rok za podnošenje prijave: (15. septembar 2018)

Konkurs se objavljuje za dodjelu sredstava u okviru projekta "Divided Past - Joint Future" koju finansira Evropska unija, u zemljama Zapadnog Balkana i Turskoj (Bosna i Hercegovina, Srbija, Crna Gora, Sjeverna Makedonija, Kosovo - prema UNSCR 1244/99, Albanija i Turska). Poziv za prijedloge je otvoren za podršku malim projektima odabranih organizacija civilnog društva i nevladinih organizacija iz zemalja Zapadnog Balkana kako bi se povećalo poštovanje različitosti i poboljšala inkluzivna praksa sa članovima zajednice i zainteresovanim stranama kroz aktivnosti izgradnje mira.

Za više informacija i kriterijume za podnošenje projektnog prijedloga ovdje možete preuzeti aplikacijski paket [Documents2](#)

Više informacija na: <http://jointfuture.org/news/call-for-the-proposals/>

Javni poziv za prijavu malih lokalnih projekata za 2019. godinu

Ambasada Republike Češke u Bosni i Hercegovini sa zadovoljstvom objavljuje godišnji poziv za podnošenje zahtjeva za male lokalne projekte 2019.

Mali lokalni projekti su sastavni dio razvojne saradnje Republike Češke u Bosni i Hercegovini i implementiraju se programom grantova kojim upravlja Ambasada Republike Češke u Sarajevu.

Uslovi za podnošenje zahtjeva za male projekte za 2019. godinu su sljedeći:

Podnosilac zahtjeva mora biti registrovana pravna osoba u Bosni i Hercegovini, čija osnovna djelatnost nije dobit.

Lokalne nevladine organizacije, organizacije lokalne zajednice, akademske ustanove koje rade na lokalnim projektima; Međunarodne, međuvladine, multilateralne i regionalne institucije, organizacije i agencije koje rade na lokalnim razvojnim aktivnostima; općinske, regionalne ili državne institucije ili agencije koje rade na lokalnim projektima.

Podnosilac zahtjeva može predati samo jedan projektni prijedlog.

Projekti se trebaju usmjeriti u sektor obnovljivih izvora energije.

Finansiranje Ambasade Republike Češke iznosi najviše 500.000 CZK (cca 18.900 – 37.800 KM), iznos treba biti zaokružen. Grantovi se isplaćuju u KM. Ukupni iznos osobnih i putnih troškova, eventualno osiguranje i slično ne smije prelaziti 25% ukupnih troškova.

Finansijsko učešće u projektu je minimalno 30% od ukupne vrijednosti projekta (finansirane aktivnosti trebaju biti jasno navedene u formularu).

Implementacija projektnih aktivnosti je od marta do 31. oktobra 2019. godine.

Zahtjev mora biti dostavljen u papirnom i elektronskom izdanju, a sadržavat će:

Identifikacijski formular mora biti ispunjen na engleskom jeziku, popunjen na kompjuteru, ovjeren i potpisan od strane ovlaštene osobe.

Kopija potvrde o pravnoj registraciji podositelja zahtjeva (pravne osobe), ako nije državna ili javna ustanova.

Dokumenti koji potvrđuju da je osoba, koja je potpisala obrazac upućen Ambasadi, predstavnik podositelja zahtjeva (pravna osoba) ovlaštena zastupati, predstavljati i potpisati ugovore u ime podnositelja zahtjeva (pravne osobe).

Rok za prijavu: 14. septembar 2018. godine 12.00 sati (podne) na sljedećoj adresi:

Razvojna saradnja
Ambasada Republike Češke
Franjevačka 13
71 000 Sarajevo

I u elektronskoj verziji na: development_sarajevo@mzv.cz

Za dodatna pitanja obratite se Odjeljenju za razvojnu saradnju Ambasade Republike Češke u Bosni i Hercegovini (tel. 033 587 052) ili posaljite e-mail na development_sarajevo@mzv.cz.

Više

informacija: https://www.mzv.cz/sarajevo/bs/Razvojna_saradnja/x2018_08_24_MLP.html

Poziv za projekte Ekumenske inicijative žena

JAVNI POZIV – PROJEKTNJA POTPORA

Ekumenska inicijativa žena objavljuje novi javni poziv za predaju projektnih prijedloga iz područja:

mira i pomirenja

ekumenskog i međureligijskog dijaloga

ženskih ljudskih prava

Jednako tako mogu sudjelovati i projektni prijedlozi koji uključuju prekograničnu suradnju unutar geografskoga područja djelovanja EIŽ-a.

Prijaviti se mogu:



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:
Omladinski resursni centar Tuzla
Hadži Bakirbega Tuzlića 1
75000 Tuzla
tel/fax: 035 258 077
e-mail: orcuzla@bih.net.ba
hcatuzla@bih.net.ba

Mjesečni bilten uređuje
Omladinski resursni centar -
ORC Tuzla

Prevod Biltena na engleski: Emir Karamujić

WEB stranica Mreže:
www.omladina-bih.net

Mejling lista Mreže:
posta@omladina-bih.net

Webmaster:
emir.delalic@gmail.com

organizacije civilnoga društva i grupe djevojaka koje djeluju u Hrvatskoj, Bosni i Hercegovini, Crnoj Gori, na Kosovu, u Makedoniji ili Srbiji, a čiji godišnji proračun ne prelazi HRK 375.000/ EUR 50.000, teologinje i studentice teologije koje djeluju u Hrvatskoj, Bosni i Hercegovini, Crnoj Gori, na Kosovu, u Makedoniji ili Srbiji.

Iznos ukupnih sredstava koja će se dodijeliti: do HRK 772.500/ EUR 103.000

Visina pojedinačne potpore:

Potpota 1: u iznosu do HRK 30.000 / EUR 4.000

Potpota 2: u iznosu do HRK 52.500 / EUR 7.000

Potpota 3: u iznosu do HRK 105.000 / EUR 14.000 (max. 4 potpore)

Rok za prijavu: 19. 9. 2018. do 15 sati.

Detaljnije informacije, kao i natječajnu dokumentaciju, možete pronaći [OVDJE](#).